



Stigtingsjaar 1909

Privaat sak X11, Arcadia 0007  
Tel. 086 133 3786  
Faks (012) 329 0293  
E-pos: akademie@akademie.co.za  
Webwerf: www.akademie.co.za

Engelenburghuis  
Ziervogelstraat 574  
Arcadia, Pretoria

Tydlike adres: Soutpansbergweg 92  
Riviera, Pretoria

5/1/5

## AKADEMIEPRYSE 2016

Graag herinner ons u aan die Akademiepryse wat gedurende 2016 vir toekenning oorweeg word. Volledig gemotiveerde voorstelle vir enigeen van hierdie pryse word ingewag. Die volgende geld ten opsigte van die voorstelle:

**Dit moet verkieslik in Afrikaans wees.**

**Dit moet deur 'n voorsteller en 'n sekondant onderteken wees.**

**Die voorstel moet duidelik motiveer waarom die bepaalde kandidaat/instansie vir die bepaalde bekroning voorgestel word. Daar moet ook duidelik aangetoon word watter spesifieke publikasies/bydraes as bekroningswaardig beskou word.**

**Die voorstel moet gesteun word deur die nuutste curriculum vitae en publikasielys van die kandidaat, indien van toepassing.**

**Die grootste mate van vertroulikheid moet gehandhaaf word. Onder GEEN omstandighede moet die kandidaat bewus wees dat hy/sy vir 'n prys genomineer word nie. Dit het al in die verlede gebeur dat daar by potensiële kandidate verwagtinge geskep is wat dan vir die betrokke kandidaat en vir die SA Akademie groot verleentheid veroorsaak het.**

**By die toekennings van pryse is die Akademieraad se besluit finaal. In die geval van 'n nominasie wat nie suksesvol was nie, sal GEEN korrespondensie of gesprekke ná die toekenning gevoer word nie – nie met voorstellers nie en ook nie met kandidate nie.**

Reglemente vir die onderskeie pryse is op aanvraag beskikbaar.

Die sluitingsdatum vir voorstelle is **25 Januarie 2016**, behalwe waar anders vermeld.

### **Pryse beskikbaar vir toekenning in 2016:**

#### **A. GEESTESWETENSKAPPE**

##### **Stalsprys**

Die Stalsprys vir Geesteswetenskappe word jaarliks toegeken vir 'n hoogstaande publikasie of 'n reeks van hoogstaande publikasies, by voorkeur, maar nie uitsluitlik nie, in Afrikaans. Verder word dit toegeken vir individuele of gesamentlike wetenskapsbeoefening en/of die lewering van individuele of gesamentlike produkte van hoogstaande gehalte waardeur buitengewone bydraes tot die wetenskapsbeoefening gemaak word. Spanprestasie of bydrae tot spanprestasie, multi- en interdissiplinêre navorsing, goeie implementerings- of evalueringsnavorsing kan ook in berekening gebring word. Werk wat voor die bekroningsjaar

gelewer is, sal vir die bekroning in aanmerking geneem word. Die volgende vakgebiede kom in 2016 aan die beurt:

- (i) Stalsprys vir Geskiedwetenskappe (Geskiedenis, Kultuurgeskiedenis, Argeologie, ens.)
- (ii) Stalsprys vir Sosiologie; Antropologie; Kriminologie
- (iii) Stalsprys vir Filosofie en Etiek; Toekomskunde; Algemene Wetenskapsleer en Algemene Navorsingsmetodologie
- (iv) Stalsprys vir Politieke Wetenskap
- (v) Stalsprys vir Ekonomie

#### **Ds. Pieter van Drimmelenmedalje of die Totiusprys vir Teologie en die studie van die grondtale van die Bybel**

Een van die twee bogenoemde pryse kan driejaarliks toegeken word. In die geval van die Ds. Pieter van Drimmelenmedalje kom aktiwiteite in aanmerking soos Bybelvertaling, teologiese handboeke in Afrikaans vir gebruik deur universiteitstudente, gepubliseerde preekbundels, godsdiensonderwys en die skryf, vertaling, toonsetting en bywerking van Afrikaanse Psalms en Gesange. In die geval van die Totiusprys kan dit toegeken word vir 'n hoogstaande publikasie of 'n reeks van hoogstaande publikasies in Afrikaans oor die Christelike teologie of die studie van die grondtale van die Bybel.

#### **Gustav Prellerprys vir Literatuurwetenskap en Letterkundige Kritiek**

Die prys is al om die drie jaar beskikbaar vir literatuurwetenskaplike werk in Afrikaans, met inbegrip van letterkundige kritiek.

#### **N.P. van Wyk Louwmedalje**

Die medalje is driejaarliks vir toekenning beskikbaar aan 'n kandidaat vir skeppende bydraes tot die ontginning, organisasie en volgehoue uitbouing van 'n vertakking of vertakking van die geesteswetenskappe, wat as 'n wesenlike en belangrike bydrae tot die bevordering van die geesteswetenskappe beskou kan word. Die bydraes moet verkieslik in Afrikaans wees.

#### **Frans du Toitmedalje vir Bedryfsleiding**

Die medalje word driejaarliks vir bedryfsleiding toegeken. Die volgende geld by die oorweging van 'n kandidaat:

- (i) skeppende bydrae tot die Suid-Afrikaanse bedryfslewe;
- (ii) volgehoue uitbouing oor 'n lang tydperk van die terreine waarop begewe is;
- (iii) leiding op bepaalde terreine en die besieling wat daar van die persoon uitgegaan het om die gebied verder te ontwikkel. Die prys word as 'n kroon op 'n lewenstaak beskou en kan slegs een maal aan 'n kandidaat toegeken word.

#### **D.F. Malanmedalje**

Die medalje word as 'n besonder hoë onderskeiding beskou en word alleen toegeken aan persone wat werk van die hoogste gehalte ter bevordering van die Afrikaanse taal en kultuur gelewer het. Die prys is elke drie jaar beskikbaar vir toekenning.

#### **Protea Boekhuistoekenning vir die beste gepubliseerde geskiedeniswerk in Afrikaans**

Gepubliseerde boeke in geskiedenis of kultuurgeskiedenis wat in 2013, 2014 of 2015 verskyn het, kom in aanmerking. Werk wat reeds die prys as ongepubliseerde verhandeling of proefskrif ontvang het, kom nie weer in aanmerking nie. Uitgewers kry geleentheid om elk twee werke voor te lê. Enige publikasie oor geskiedenis of kultuurgeskiedenis in Afrikaans kwalifiseer, dus nie noodwendig 'n gepubliseerde M- of D-graad nie.

## **B. KUNSTE**

#### **Hertzogprys vir Prosa**

Alle prosawerk van hoogstaande gehalte wat in die drie kalenderjare wat die bekroning voorafgaan, verskyn het, kom vir dié toekenning in aanmerking.

**Eugène Maraisprys**

Die Eugène Maraisprys word toegeken vir 'n eerste of tweede belletristiese publikasie in Afrikaans. Die prys is jaarliks beskikbaar en kan net een maal aan 'n bepaalde skrywer toegeken word.

**Scheepersprys vir Jeugliteratuur**

Die prys word driejaarliks toegeken vir 'n werk in Afrikaans in enige genre vir tieners en jong volwassenes en kan meer as een keer aan dieselfde persoon toegeken word.

**Alba Bouwerprys vir Kinderliteratuur**

Die prys word toegeken vir enige literêre werk in die kategorie kinderliteratuur, d.w.s. die groep lesers van 7 tot 12. Die prys word driejaarliks toegeken en dieselfde skrywer mag die prys meer as een keer ontvang.

**Erepenning vir Televisiedrama in Afrikaans**

Die erepenning word driejaarliks toegeken vir televisiedrama in Afrikaans (waarby dramareekse ingesluit is). Werke wat uitgesaai is deur alle uitsaainetwerke in die drie kalenderjare wat die bekroningsjaar voorafgaan (2013, 2014, 2015), kom in aanmerking.

**Erepenning vir Rolprentkuns in Afrikaans**

Die Akademie se erepenning is bedoel as erkenning, binne die doelstellings van die Akademie, van besondere prestasie op terreine wat nie suiwer letterkundig of wetenskaplik is nie. Die Erepenning vir Rolprentkuns in Afrikaans kom driejaarliks aan die beurt.

**Erepenning vir Visuele Kunste**

Die visuele kunste word jaarliks bekroon en sluit o.a. die volgende kunsvorme in: skilderkuns, beeldhoukuns, argitektuur, weefwerk, keramiek, mosaïek, fotografie, advertensiewese en animasie-rolprente.

**Huberte Rupertprys vir Klassieke musiek**

Die prys kan jaarliks toegeken word.

Instrumentaliste (klawer-, blaas-, snaarinstrumente, ens.) of kunstenaars wat die volgende bespeel: klawerbord (orrel, klavier, klawesimbel) of strykers (viool, ens.) kom in 2016 in aanmerking vir die prys.

**Deleen Bekkerprys vir beste draaiboek vir 'n TV-drama in Afrikaans**

In 2016 word die prys toegeken vir die beste draaiboek vir 'n TV-drama in Afrikaans.

Draaiboeke van Afrikaanse TV-dramas wat in die voorafgaande drie jaar vertoon is, kom in aanmerking. TV-draaiboeke (hetsy 'n enkel drama of een episode uit 'n reeks) wat in die voorafgaande drie jaar (2013, 2014 en 2015) gebeeldsend is, kom in aanmerking.

**C. NATUURWETENSKAP EN TEGNOLOGIE****Goue Akademiemedalje vir Natuurwetenskaplike Prestasie**

Die medalje word toegeken vir verdienstelike werk op die gebied van die natuurwetenskap, tegniek of geneeskunde. Dit word toegeken vir hoogstaande werk van praktiese uitvinding (of toepassing) en vernuf, gebaseer op wetenskaplike en/of proefondervindelijke grondslag. Die medalje kom driejaarliks aan die beurt en kan meer as een keer aan dieselfde persoon/instansie toegeken word.

### **M.T. Steynprys vir Natuurwetenskaplike en Tegnologiese Prestasie**

Dit is een van die belangrikste eerbewyse van die Akademie vir leierskap op die hoogste vlak op die gebied van die natuurwetenskap en die tegnologie. Die prys is 'n kroon op 'n lewenstaak en kan net een maal aan 'n persoon toegeken word. Die kandidaat se skeppende bydraes tot die ontginning, organisasie en volgehoue uitbouing van 'n vertakking of vertakkings van die natuurwetenskap of die tegnologie en wat as 'n wesenlike en belangrike bydrae tot die bevordering van die natuurwetenskap of die tegnologie beskou kan word, en die suksesvolle toepassing daarvan in landsbelang. Die medalje kan jaarliks toegeken word.

### **Havengaprys**

Die Havengaprys word jaarliks toegeken vir oorspronklike navorsing op natuurwetenskaplike en/of tegniese gebied. Die nodige vereistes by die beoordeling van kandidate is eerstens navorsingspublikasies en tweedens bewys van die bevordering van Afrikaans. Ander prestasies in belang van die wetenskap sal ook in aanmerking geneem word. Die prys kan net een maal aan 'n bepaalde persoon toegeken word. In 2016 kom die volgende vakgebiede aan die beurt:

- (i) Havengaprys vir Lewenswetenskappe (vir navorsing op lewende materiaal, uitgesluit die mens) (bv. Landbou, Biologie, Veeartsenykunde, ens.)
- (ii) Havengaprys vir Gesondheidswetenskappe (Geneeskunde, Tandheelkunde, ens.)

### **Erepenning vir Natuurwetenskap en Tegnologie**

Hierdie erepenning word toegeken op die terreine wat nie reeds ondervang is deur ander bekroningsgebiede binne die Fakulteit nie. Dit word slegs toegeken vir werk van hoogstaande kwaliteit en word net in uitsonderlike gevalle toegeken.

### **Senior Kaptein Scott-gedenkmedalje**

Die medalje kan driejaarliks toegeken word aan enige bioloog in suidelike Afrika wat uitmuntend in sy/haar werksveld presteer het. Wetenskaplike werk van meer toegepaste aard en van voortrefflike gehalte wat die status van die biologiese wetenskappe bevorder het deur bv. hoogstaande navorsing, onderwys of bestuursleiding, kom hiervoor in aanmerking. Dit kan óf vir 'n enkele uitstaande bydrae óf vir 'n voortgesette bydrae oor 'n lang tydperk op die gebied van die omgewingsbiologie toegeken word.

### **Junior Kaptein Scott-gedenkmedalje (Dierkundige Wetenskappe)**

Die medalje kan jaarliks toegeken word vir die beste verhandeling ingedien by 'n Suid-Afrikaanse universiteit vir die M.Sc.-graad, om die beurt in die dierkundige of plantkundige wetenskappe. In 2016 kom dierkundige wetenskappe aan die beurt.

Keerderdatum vir nominasies: **15 Januarie 2016**.

By voorbaat dank.

(w.g.) DR. DIONĒ PRINSLOO  
HOOF UITVOERENDE BEAMPTE